

**BOSNA I HERCEGOVINA
FEDERACIJA BOSNE I HERCEGOVINE
Tuzlanski kanton
GRAD TUZLA
GRADSKO VIJEĆE**

S T E N O G R A M

**SA ŠESTE VANREDNE SJEDNICE GRADSKOG VIJEĆA TUZLA ODRŽANE
02. DECEMBRA 2022. GODINE U POSLOVNOM OBJEKTU „GRAFIČAR“ SA
POČETKOM U 10,00 SATI.**

- SJEDNICI PRISUSTVUJE 29 VIJEĆNIKA.

U Tuzli, decembar 2022. godine

NATAŠA PERIĆ – predsjedavajući Gradskog vijeća Tuzla

Poštovani vijećnici Gradskog vijeća Tuzla, predstavnici medija, predstavnici gradskih službi, gosti, otvaram 6. Vanrednu sjednicu Gradskog vijeća.

Konstatujem da prema evidenciji Stručne službe Gradskog vijeća sjednici prisustvuje 28 vijećnika od ukupno 30 vijećnika, što je dovoljno za punovažan rad i odlučivanje.

Svoj izostanak sa sjednice danas je najavio vijećnik Aleksandar Vujadinović, a trenutno nema ni vijećnika Omera Berbića, ne znam razloge.

Podsjećam da je Centralna izborna komisija Bosne i Hercegovine 02. 11. donijela Odluku o utvrđivanju objavljivanju konačnih rezultata Općih izbora u Bosni i Hercegovini 2022. godine, broj 05-1-07-1-2355-1/22, kojom su potvrđeni rezultati Općih izbora u Bosni i Hercegovini, održani 2.10.2022.

Prema potvrđenim rezultatima Općih izbora u Bosni i Hercegovini 2022., gradonačelnik Grada Tuzle Jasmin Imamović osvojio je mandat zastupnika u Predstavničkom domu Parlamentarne skupštine Bosne i Hercegovine.

Odredbom člana 1.10 Izbornog zakona Bosne i Hercegovine („Službeni glasnik Bosne i Hercegovine“, broj 23/01., 7/02., 9/02., 20/02., 25/02., 4/04., 20/04., 25/05., 52/05., 65/05., 77/05., 11/06., 24/06., 32/07., 33/08., 37/08., 32/10., 18/13., 7/04., 31/16., 41/20., 38/22. i 51/22.) propisano je da izabranom članu organa vlasti na svim nivoima prestaje mandat prije isteka vremena na koje je izabran, danom podnošenja ostavke.

Centralna izborna komisija Bosne i Hercegovine je 30.11.2022. donijela Odluku o prestanku mandata, broj 06-1-07-1-4733/22, kojom se Imamović Jasminu, gradonačelniku Grada Tuzle, izabranom na Lokalnim izborima 2020. godine sa liste političkog subjekta SDP - Socijaldemokratska partija Bosne i Hercegovine, utvrđuje prestanak mandata sa danom podnošenja ostavke, 16.11.2022. godine.

Time su se stekli uslovi za izbor vršioca dužnosti gradonačelnika Tuzle.

Odredbom člana 7. stav 2. Zakona o izboru, prestanka mandata, opozivu i zamjeni načelnika općina u Federaciji Bosne i Hercegovine („Službene novine Federacije Bosne i Hercegovine“, broj 19/08.) propisano je da dužnost načelnika u slučaju prestanka mandata u smislu člana 5. ovog Zakona do ponovnog izbora načelnika vrši osoba izabrana od općinskog vijeća većinom od ukupnog broja članova općinskog vijeća.

Imajući u vidu navedene odredbe, u skladu sa članom 60. stav. 6. Poslovnika Gradskog vijeća Tuzla, zakazala sam Vanrednu sjednicu Gradskog vijeća Tuzla na kojoj je potrebno izvršiti izbor vršioca dužnosti gradonačelnika Grada Tuzle.

Za današnju 6. vanrednu sjednicu Gradskog vijeća predlažem

DNEVNI RED

- 1. IZBOR VRŠIOCA DUŽNOSTI GRADONAČELNIKA GRADA TUZLE I**
- 2. TEKUĆA PITANJA**

Stavljam na izjašnjavanje predloženi Dnevni red i pozivam vijećnike da se izjasne.

Poništavam glasanje. Samo minutu dajem dok... Nemojte molim vas dobacivat. Molim da poništimo ovo glasanje i ponovo da glasamo o Dnevnom redu. Molim vijećnike da se izjasne. Glasanje je okončano. Konstatujem da je za Dnevni red, da je Dnevni red usvojen sa

29 glasova za, niko nije bio protiv, nije bilo suzdržanih.

DNEVNI RED

- 1. IZBOR VRŠIOCA DUŽNOSTI GRADONAČELNIKA GRADA TUZLE I**
- 2. TEKUĆA PITANJA**

Prelazimo na prvu tačku:

IZBOR VRŠIOCA DUŽNOSTI GRADONAČELNIKA GRADA TUZLE

Podsjećam da je članom 145. Poslovnika Gradskog vijeća Tuzla - Drugi prečišćeni tekst („Službeni glasnik Grada Tuzla“, broj 5/22.) propisano da prijedloge kandidata za izbor i imenovanja, koja vrši Gradsko vijeće, predlaže Gradskom vijeću Komisija za izbor i imenovanja ili klubovi vijećnika političkih stranaka koje participiraju u Gradskom vijeću ili vijećnici Gradskog vijeća.

Komisija za izbor i imenovanja je na sjednici održanoj 01.12. razmotrilo, u poslovničkom roku, pristigli Prijedlog vijećnika Gradskog vijeća Tuzla, te je usvojila sljedeće zaključke. Pod:

1) Komisija za izbor i imenovanja konstatuje da je Centralna izborna komisija Bosne i Hercegovine na svojoj 89. hitnoj sjednici, održanoj 30.11.2022. godine donijela Odluku o prestanku mandata Jasminu Imamoviću, gradonačelniku Grada Tuzla, izabranom na Lokalnim izborima 2020. sa liste političkog subjekta SDP-SOCIJALDEMOKRATSKA PARTIJA BOSNE I HERCEGOVINE, kojom se utvrđuje prestanak mandata Jasminu Imamoviću, gradonačelniku Grada Tuzle sa danom 16.11.2022., a čime su se stekli uslovi za izbor vršioca dužnosti gradonačelnika Grada Tuzla.

2) Komisija za izbor i imenovanja je razmotrila Prijedlog vijećnika Gradskog vijeća Tuzla za imenovanje vršioca dužnosti gradonačelnika Grada Tuzle, te Gradskom vijeću predlaže da se za vršioca dužnosti gradonačelnika Grada Tuzla izabere Zijad Lugavić, diplomirani ekonomista.

Prijedlog vijećnika Gradskog vijeća ste dobili uz poziv za današnju sjednicu, a zaključke i prijedlog Komisije za izbor i imenovanja da se za vršioca dužnosti gradonačelnika Grada Tuzla izabere Zijad Lugavić, diplomirani ekonomista, ste dobili pred početak današnje sjednice.

Otvaram raspravu Klubova vijećnika. Dužna sam da pročitam biografiju.

Zijad Lugavić za vršioca dužnosti gradonačelnika grada Tuzle, rođen je u Tuzli 15.10.1973. godine, gdje je završio osnovno i srednje obrazovanje. Diplomirao je na Ekonomskom fakultetu Univerziteta u Tuzli 2000. godine. Nakon završenih postdiplomskih studija magistrirao je 2014. a zvanje doktora društvenih nauka iz područja ekonomije Ekonomija i biznis, Digitalna ekonomija stekao na Ekonomskom fakultetu Univerziteta u Tuzli 2020. Zijad Lugavić bio pripadnik Armije Republike Bosne i Hercegovine od aprila 1993. do decembra 1995. Svoju bogatu profesionalnu karijeru započeo 1996. radeći kao prevodilac međunarodnim organizacijama gdje se zadržao do 2003. Potom 2003. kao stručni saradnik za poduzetništvo prvi puta zasniva radni odnos u organima uprave tadašnjoj Općini Tuzla, gdje ostaje sve do 2004. godine, kada prelazi u realni sektor. Od 2004. do 2006. u Mercator Bosna i Hercegovina d.o.o Sarajevo, obnaša dužnost direktora Mercator centra Tuzla, a od 2006. do 2008. obavlja i funkciju direktora maloprodaje, veleprodaje i logistike Mercatora Bosne i Hercegovine u centrali i navedene kompanije u Sarajevu. Nakon toga 2008. godine, Zijad Lugavić je bio imenovan na poziciju direktora Javne ustanove Gradski stadion „Tušanj“ Tuzla

gdje ostaje do 2012. godine, kada se opet vraća u organe uprave tadašnje Općine Tuzla. Od 2012. do 2018. radi kao pomoćnik gradonačelnika za Službu za inspekcijske poslove, a od 2018. do 2021. kao pomoćnik gradonačelnika za Službu za ekonomski razvoj i društvene djelatnosti. Trenutno obavlja dužnost pomoćnika gradonačelnika za Službu za ekonomski razvoj, poduzetništvo i poljoprivredu. Njegovu profesionalnu karijeru koja obuhvata rad u mnogim značajnim oblastima života i rada, kao što su ekonomski razvoj i poduzetništvo, kultura, sport, pitanja mladih, saradnja sa nevladinim sektorom, pitanja nacionalnih manjina, inspekcijski poslovi, te rad u realnom sektoru, krasi bogata univerzitetska karijera. Zijad Lugavić je obavljao dužnost vanjskog saradnika na Ekonomskom fakultetu u Tuzli, na predmetima Poslovna informatika i digitalna ekonomija, te profesora Visoke škole FINra Tuzla na predmetima Osnove ekonomije, E-Marketing, Primjena IT u finansijama i računovodstvu, Ekonomija Evropske Unije i Porezni sistemi u Bosni i Hercegovini i Evropskoj Uniji. Zvanje docenta iz oblasti menadžmenta stekao je početkom 2022. godine. Zijad Lugavić je autor i koautor mnogobrojnih naučnih stručnih radova, a bio je član radnih grupa i timova, imenovani kako strane Grada Tuzle, tako i od strane viših nivoa vlasti na realizaciji raznih projekata iz oblasti izrade strategija, digitalne ekonomije i menadžmenta. Tokom svoje profesionalne karijere bio je član, a i komandant Gradskog štaba Civilne zaštite, kao i predsjednik Gradske komisije Tuzla za popis stanovništva, kućanstava i stanova u Bosni i Hercegovini 2013. Aktivan je u Bošnjačkoj zajednici kulture „Preporod“, Ženskom omladinskom klubu, Odbojkaškom klubu „Sloboda“ Tuzla, gdje je obavljao i obavlja značajne dužnosti. Član je Socijaldemokratske partije Bosne i Hercegovine.

Otvaram raspravu Klubova vijećnika. Vijećnik Ćerim Rastoder. Izvolite.

ĆERIM RASTODER – samostalni vijećnik

Uvažena predsjedavajuća, kolegice i kolege liječnici, uvaženi predstavnici Gradske službe, prisutni danas, direktori javnih ustanova i preduzeća, mediji. Ja bih se vrlo kratko osvrnuo, s obzirom da je predsjedavajuća u uvodnom dijelu iznijela jednu kraću biografiju, bibliografiju doktora Zijada Lugavića. Vrlo nam je važno da ovaj period do održavanja izbora imamo referentnu i stručnu osobu koja će obnašati vršioca gradonačelnika, s obzirom da je kraj godine, da donosimo budžet i niz drugih aktivnosti.

Iz biografije pa i bibliografije kraće koju je dostavio doktor Zijad Lugavić, da se primijetiti da se radi o veoma referentnoj osobi, koja je završila sve nivoe školovanja zaključno sa docenturou, odnosno, za odbranu doktorske disertacije na društvenim naukama. Steko je najveći stepen zvanja i naravno angažiran je u nastavi. Možemo slobodno reći da s obzirom na ovu njegovu biografiju ovdje pročitano, da se radi o osobi koja je objedinila i teoriju u praksi i praksu da se radi o osobi koja je bila na rukovodećim dužnostima, a znamo i sami ovdje kroz Gradsko vijeće da se radi o čovjeku koji je jako sposoban za timski rad i mislim da, da ćemo danas nakon glasanja jednoglasnom odlukom donijeti jednoglasnu odluku o vršiocu dužnosti.

Impozantno je navesti takođe i njegovu veliku bibliografiju. Vidim u ovim radovima da je objavio veliki broj stručnih naučnih radova u domaćim i stranim časopisima.

Dalje, da je angažiran u nastavi. Da govori engleski jezik. I to je ono što, što nam garantuje da ćemo u naredna tri mjeseca, da grad neće puno izgubiti, odnosno, da ćemo ići onim putem kojim smo i do sada išli.

A ono što bi ja posebno i zbog čega sam se javio, najviše htio reći u ovoj biografiji doktora Lugavića jeste činjenica da je iako je bio mlad, relativno mlad, da je učesnik obrambeno oslobodilačkog rata od 93 do 95. Istina za volju to se danas sve manje, ovaj, ima značaj, ali za mene je to veoma važno, ko i za većinu nas vijećnika.

I ja smatram da, da ćemo današnjim izborom, nadam se će biti jednoglasan, dobiti jednu osobu koja će u naredna tri mjeseca, a možda i dalje, vidjet ćemo, veoma uspješno obavljati dužnost gradonačelnika. S tim u vezi, ovaj, ja ću glasati ko i većina nas za ovu, za doktora Zijada Lugavića za dužnost vršio...za vršioca dužnosti gradonačelnika. Toliko. Hvala.

NATAŠA PERIĆ

U redu. Hvala. Kolega Omer Berbić. Izvolite.

OMER BERBIĆ – vijećnik Naše stranke

Hvala ljepo. Ja mogu slobodno reć druga Ziju znam. Drug Zijo je dobar čovjek. Profesionalac u svom poslu do sada smo to vidjeli. Ali, mi smo zasjedali kao Naša stranka i donijeli smo jednu odluku koja kaže da mi nećemo da glasamo za čovjeka. Glasamo za program, za ideje. Na kraju krajeva, glasamo za nešto što je realno ispunjivo u ovom periodu od dva do tri mjeseca koliko će drug Zijo biti VD gradonačelnik.

Ja sam lično bio mnogo puta u sukobu sa Jasminom Imamovićem, prošlim gradonačelnikom, zato što smatram da on nije dobar čovjek. A Zijo jeste dobar čovjek. I nadam se da ga funkcija barem ova na dva ili tri mjeseca neće promijeniti. Iz tog razloga, jučer smo mi zasjedali u Našoj stranci i donijeli smo odluku da ćemo podržati, ovaj, Zijada. Ali uslovno. Šta znači uslovno? Želimo da drug Lugavić svojim postupcima, svojim djelima nas na neki način okrene za sebe, umjesto protiv sebe. Želimo da, da svojim radom ispunio je evo ovu naši uslovno povjerenje koje ćemo mu dati. Na način da ispuni evo mi imamo pet il šest principa za koje smatramo da se mogu dva do tri mjeseca ispuniti. I da na taj način zavrijedi naše povjerenje i da pokaže da grad Tuzla može ići naprijed u odnosu na ovo što je stagnirala zadnjih deset do petnaest godina otkad je gospodin Imamović bio gradonačelnik, nažalost. Iz tog razloga mi ćemo sada dati povjerenje drugu Ziji.

Ali ćemo dobro razmisliti za dva do tri mjeseca šta da radimo. Ali ovo povjerenje se zasniva na nekih pet do šest principa. Realno ispunjivih principa za koje ispod koje mi ne možemo.

Prvi princip je da mi želimo da uđe nezavisna međunarodna revizija i da provjeri finansijsko realno finansijsko stanje našeg grada. Jer imamo mnogo sumnji u odnosu na ono što se dešavalo u Gradskoj upravi zadnjih 20 godina, da nije u skladu sa zakonima, da nije u skladu sa principima da nije u skladu s ovim građanskim duhom naše, naše Tuzle.

Drugo je da se hitno riješi stanje u Gradskom i prigradskom saobraćaju, pa barem privremeno, u odnosu na to, kako Gradski i prigradski saobraćaj treba da izgleda? Koliko treba da bude redovan i kako? Koliko treba da košta? Mi imamo najskuplji gradski i prigradski saobraćaj u državi Bosni i Hercegovini. Iz tog razloga ovo je naš drugi princip želimo evo ide sad budžet da se ili kroz subvencije ili kroz javni natječaj riješi pitanje Gradskog i prigradskog saobraćaja.

Treći princip je princip za koji smo se zalagali i ja i kolegica Selma i mnogi od nas, samo neki su morali da glasaju po odnosu na diktaturu. Ali nema veze. Evo sada se to može ispuniti.

Želimo jedan dan sedmično da gradonačelnik prima građane, pa nek to bude 4 sata, nek bude u Ateljeu Ismeta Mujezinovića, po tri, četiri, pet minuta. Nisu to veliki zahtjevi. Ali da jednom sedmično gradonačelnik prima građane. I ovo bi mi zahtijevali da se nap... da, da se donesu prve tri odluke novog gradonačelnika. Mislim da je to realna jedna odluka, jedna lako sprovodiva odluka i odluka koju bi novi gradonačelnik trebao poštovati, kao što je i gradonačelnik prije Jasmina Imamovića.

Dalje. Želimo da se provedu izbori u mjesnim zajednicama. Možda nije realno da se sprovedu u ova dva do tri mjeseca, ali je realno da se donese odluka na prijedlog novog gradonačelnika, odnosno, njegovih službi, da se donese odluka kojom će se utvrditi tačno vrijeme i tačan način izbora u mjesnim zajednicama, pa nek bude negdje u petom, šestom mjesecu. Sve OK. Ali želimo da se ovo napravi, iz razloga što smatram da su mjesne zajednice potpuno politizirane i da ljudi nemaju mogućnosti dađu u njih, ukoliko nisu u nekoj političkoj partiji, što je mimo zakona.

Dalje, novac od Termoelektrane želimo da se troši, namjenski za smanjenje aerozagađenja. Evo ide budžet opet kažemo za mjesec dana ćemo ga usvajati. Novac od Termoelektrane se do sada trošio na neke projekte koji nemaju veze sa aerozagađenjem, kao što recimo sanacija Slane Banje, čijom se ja apsolutno slažem. Ali ne iz novca od Termoel... koji dobijamo od Termoelektrane. Taj novac treba da ide za aerozagađenje. Ne možemo da dišemo. Mi u, u, u vrhu smo po dobijanju kancera u Bosni i Hercegovini. Kao grad i zato smatramo da je aerozagađenje trenutno možda i najveći problem evo za ove stvari koje smo do sada pobrojali.

I zadnja stvar. Želimo puno efikasnije, puno efikasnije Komunalnu službu da nam grad bude čišći, ljepši, uređeniji da se mjesne zajednice koje do sada nisu imale te mogućnosti, da se redovno održavaju u smislu kada zapada snjeg. Da se redovno održavaju zelene površine kada bude ljeto. Evo to sada neće moći biti u ova dva do tri mjeseca. Ali želimo naš grad da bude čišći, ljepši, uređeniji. Sve ostale projekte javno-privatnog partnerstva za koje smatramo da bi se trebao napraviti, kao što je stadion „Tušanj“, kao što je izmiještanje zatvora iz centra grada, kao što xy drugih projekata smo spremni čekati. Ali ovo su projekti koji se mogu realno završiti u dva do tri mjeseca i ovo su stvari koje se realno mogu završiti dva, tri mjeseca. I to nije nerealno.

Naravno, ne može se ni privreda pokrenuti odmah. Ali očekujem evo kao čovjeka koji je bio u realnom sektoru, da pet do šest mjeseci. Da se ne čeka dozvola, odnosno, Regulacioni plan gore za Gornju Tuzlu za Industrijsku zonu. Evo čekamo godinu dana. Da ne čekamo stvari koje ovaj grad treba pokrenuti, jer moja generacija odlazi.

Iz moje ulice, od petnaestero djece ostalo je nas troje. To je problem koji moramo svi pogledati u oči i početi rješavati. On se najlakše rješava privredom.

Ali evo razumijemo da je kratak period dva do tri mjeseca do Vanrednih izbora. Ukoliko se ovi principi ispoštuju, Naša stranka neće imati dileme da li će imati gradonačelnika, odnosno, kandidata za gradonačelnika. Ukoliko se ovi principi ne ispoštuju, Naša stranka će najvjerovatnije imati kandidata za gradonačelnika.

I da završim. Želim puno sreće, puno rada, puno volje za boljim životom, novom VD gradonačelniku ova dva do tri mjeseca. Neću da kažem da želim da će biti bolji od starog, jer to nije teško. Želim da kažem da će biti puno bolji od starog. Želim mu puno sreće. Želim mu da ne dolazi u posao, na posao u 12, nego da dolazi na posao u 7 i da izlazi, s posla u 6, jer to je posao koji to, to zahtjeva. Imat će podršku moju lično kroz Gradsko vijeće za projekte za koje želi da se bori. Naravno, uvijek ću se boriti protiv neprincipijelnih stvari. I borit ću se protiv samovolje Gradskog vijeća (NATAŠA PERIĆ – U redu). Hvala ljepo i puno sreće.

NATAŠA PERIĆ

Hvala. Selma Čatibušić ispred Kluba Platforme za progres. Izvolite.

SELMA ČATIBUŠIĆ – vijećnik Platforme za progres

Dobar dan svim kolegicama i kolegama. Ja ću pokušati biti veoma kratka. Želim prvenstveno da poželim i sreću prethodnom gradonačelniku na višim nivoima vlasti, odnosno

u Parlamentarnoj skupštini Bosne i Hercegovine. Ko god ode ono što se kaže na više nivoa da li u parlament ili skupštinu vrlo često smo svjedoci da nakon prelaska Karaule više se niko ne sjeti svoje lokalne zajednice, tako da nadam se da to eto neće biti slučaj.

Što se tiče novog izbora VD ili vršioca dužnosti i gradonačelnika možemo da kažemo da smo zadovoljni prijedlogom. Ono što mi smo ispred Kluba željeli sugerisati jeste da novoizabrani VD gradonačelnik ili eto budući gradonačelnik ili gradonačelnica koji budu izabrani na izborima nakon je li vršioca dužnosti, da li će to biti ista ili neka druga osoba ne važno voljela bih da na neki način puno bude bliža Gradskom vijeću, svim Gradskim vijećnicima i da svati da mi nismo ovdje uopšte za neku svoju svrhu, nego smo prvenstveno je li glas građana i obzirom da smo usvojili neke glasove i ušli u ovo Vijeće zaslužujemo da nam se da značaj kada su, kada se bar govori o nekim bitnim pitanjima.

Ono pitanje za koje ću se posebno nastaviti zalagati i voljela bih da budući gradonačelnik i gradonačelnica, evo dal gospodin Zijad sad kao vršilac dužnosti ili neki drugi, neka druga osoba, smatram da bismo mogli početi od toga da svako dijete ima pravo na vrtić. Gradsko vijeće je nadležno za predškolsko obrazovanje i Grad Banja Luka kao i Kanton Sarajevo su već vrlo lako i jednostavno riješili ovaj problem.

Iz Budžeta našega Grada ogromne novce izdvajaju za finansiranje političkih stranaka, konkretno eto i moje političke stranke. Mislim da je to dobar početak gdje se može da tako kažem uslovno sasjeci taj novac i usmjeriti u evo konkretno ovaj projekat, da se sufinansira boravak sve djece u vrtićima na nivou našeg grada.

Naš Tuzlanski kanton, odnosno Vlada Tuzlanskog kantona je počela s time. Dobar je početak, ali mislim da Tuzla kao centar kantona definitivno može u tome i da prednjači, da pokažemo da iako dolazi do pada nataliteta, mladi odlaze, manje se djeca je li rađaju da na neki način svi pokažemo (NATAŠA PERIĆ – Molim vas da upalite svje...izvinjavam se Selma. Samo svjetlo. Neko se naslonio.) svi pokažemo da nam je ovaj problem bitan i da ćemo se pozabaviti ovim problemom. Mislim da je to dobar početak i mislim da osoba koja uslovno rečeno zasjedne na to mjesto svakako bi pokupila simpatije svih građana i građanki ovog grada.

Tako da evo skratit ću i reću da želim puno sreće i da će Klub vijećnika Platforme za progres podržati gospodina Zijada Lugavića, ali isto tako nadam se da će gospodin Zijad Lugavić podržati i vijećnice Platforme za progres u njihovim idejama i inicijativama koje na kraju krajeva dolaze od strane građanki i građana ovog grada i da bez obzira što smo različite političke partije kada uđemo u ovu salu, odnosno kada zasjednemo je li na neku funkciju mi smo prvenstveno je li u...mi smo prvenstveno tu za, za naš grad i za naše sugrađane.

Tako da eto puno sreće u radu i mi ćemo podržati ovaj prijedlog.

NATAŠA PERIĆ

U redu. Hvala Selma. Vijećnik Senad Mehmedinović ispred zajedničkog Kluba.

SENAD MEHMEDINOVIĆ – vijećnik Pokreta demokratske akcije

Poštovana predsjedavajuća, zamjenici predsjedavajuće, kolege vijećnici, predstavnici Službi, mediji, gosti sve vas srdačno pozdravljam.

Meni je čast i zadovoljstvo da budem od, jedan od vijećnika koji će glasati za VD gradonačelnika sa ovakvom impozantnom biografijom. Kandidata za VD gradonačelnika ne poznajem dugo. Poznajem ga dvije godine međutim, osvrnut ću se na biografiju koja je dostavljena u prilogu dokumenata. Zanimljivo je npr. meni lično da od 10 ličnih osobina koje su navedene u biografiji ona koja prvo krasi budućeg vjerujem VD gradonačelnika, a to je poštenje. To je nečemu što i lično težim i naravno da trebaju da svi budu oni na rukovodećim pozicijama koji krasi poštenje kao lična osobina.

93.-95. što je kolega Ćerim rekao znači, ne smije se zaboravit. Sa 20 godina biti u Armiji Republike Bosne i Hercegovine na tom se može samo čestitati. Kandidat za VD gradonačelnika po stručnom zvanju je diplomirani ekonomista i ono što se može iz biografije vidjeti da je punih 19 godina u struci. Dakle, isključivo se bavio poslovima koji su poslovi diplomiranog ekonomiste. Od toga 18 godina na rukovodećoj poziciji, govori se u prilog da se, da je kompetentan za poziciju VD gradonačelnika, a od tih 18 godina na rukovodećoj poziciji, 19 godina u struci, imamo osobu koja je 10 godina u Gradskoj upravi kao pomoćnik gradonačelnika i lično smatram da je najbolje rješenje generalno da neko bude VD gradonačelnik upravo čovjek koji poznaje kako funkcioniše jedna Gradska uprava i da dođe neko iz porodice zaposlenih u Gradskoj upravi.

Pored stručnog zvanja imamo i naučno zvanje doktor društvenih nauka iz područja ekonomije – Ekonomski fakultet pa boldiram sad ja Univerziteta u Tuzli i naučno zvanje, vidi se da prati i akademsko pitanje kandidata za VD gradonačelnika tako što je objavljeno šesnaest različitih naučnih i stručnih radova koji su u kontinuitetu od 2014. do 2022. godine.

Za ove dvije godine koliko poznajem kao vijećnik kandidata moram da naglasim i ono što sam vidio, jeste izuzetno dobra saradnja sa vijećnicima. Vijećnici se ne-ignorišu. Služba kojom je rukovodio redovno odgovara na vijećnička pitanja, a mi smo svi svjedoci ovdje da se krši član 100. Statuta Grada Tuzle, jer na vrijeme ne dobijamo odgovore na vijećnička pitanja i vijećničke inicijative i tu čestitam gospodinu Zijadu.

U njegovj nadležnosti su ako se ne varam javna preduzeća i javne ustanove. Znači, možemo slobodno da kažemo da je čovjek kojeg isto krasí multitasking takva i jeste pozicija, pozicija gradonačelnika.

Sa zadovoljstvom ću glasat za VD gradonačelnika, ali moram da kažem isto da čestitam Jasminu Imamoviću na 22 godine gradonačelničke pozicije. Naravno da ima odličnih projekata koji su ostali, da postoje djela koja su ostala iza gradonačelnika, a uvijek ima nekih propusta al bogami ima i dobrih dijela i ja lično smatram da kao dobar dio drugih političara koji su otišli s Tuzlanskog kantona ka Sarajevu da prošli gradonačelnik i sada zastupnik u državnom Parlamentu neće imati tzv. Karaula sindrom. Hvala ljepo.

NATAŠA PERIĆ

U redu. Hvala.

Zaključujem raspravu klubova vijećnika.

Otvaram raspravu vijećnika. Vijećnik Zijah Rifatbegović.

ZIJAH RIFATBEGOVIĆ – vijećnik Stranke demokratske akcije

(vijećnik Zijah Rifatbegović govori bez uključenog mikrofona op.a.)

NATAŠA PERIĆ

Samo mikrofón molim vas.

ZIJAH RIFATBEGOVIĆ

Uvažene dame i gospodo, poštovane vijećnice i vijećnici, uvaženi predstavnici medija, Gradske uprave Gradski odbor SDA će u punom kapacitetu podržat gospodina Zijada Lugavića.

Uz sve njegove reference koje ste vi naveli neophodno je reći da se radi o izuzetno vaspitanom i odgojenom čovjeku, čovjeku grada Tuzle, čovjeku koji zna prepoznat karakteristike vrijednosti i koji će sigurno bit prepoznatljiv u svom radu.

Ono što želim još istaći da gospodinu Jasminu Imamoviću želim puno zdravlja i sreće na novoj funkciji i vjerujem da će svojim radom doprinijeti da Tuzla napreduje i dalje u punom kapacitetu.

Hvala još jednom i SDA će podržat Gradski odbor u punom kapacitetu gospodina Zijada Lugavića.

NATAŠA PERIĆ

U redu. Hvala. Vijećnik Nikica Vidović.

NIKICA VIDOVIĆ – vijećnik Hrvatske demokratske zajednice BiH

Poštovanje. Sve vas ljepo pozdravljam, sve vijećnice i vijećnike, drage goste, novinare, službe, evo i kandidata za VD gradonačelnika i sve one za koga sam promakao evo isprika.

Ono što ću prokomentirati, neću hvalit, to je manje više sve rečeno i jedino što evo moram opasku ovako više kao političar, da je na kraju u tekstu vjerujem vješto sa nekih od političkih akademija naučeno provučeno da je kandidat SDP-a što ja nisam nigdje pročitao.

Ja ću kao što sam i rekao na ovom popisu gdje su bili potpisi za gospodina Zijada Lugavića glasovati, ali ne za kandidata SDP-a Zijada Lugavića, tako da da budem tu čist, ali evo i ovom prigodom zahvaliti načelniku koji je iz SDP-a, koji je mislim kolko se ne varam isto glasovao za kandidate HDZ-a što mi je jako drago da sed taj neki, neka demokracija uvukla i u tuzlake i naravno evo i u moju ja ću reći prijateljsku tuzlansku organizaciju SDP-a i slično.

Kao HDZ i kao vijećnik sam rekao i mi ćemo podržati podržati gospodina Zijada Lugavića sa naravno impozantnom biografijom i što se mene osobno tiče u evo 2 godine i tri-četiri mjeseca i nešto prije, sam kroz neke druge projekte surađivao kratko s gospodinom Lugavićem. Definitivno se ne može naći zamjerka i evo ja sazivam ga i pozivam da ostane takav kakav jeste i da uradi sve što je u njegovoj moći da u ova tri mjeseca odradi posla što se treba odradit. Naravno uz to ovdje će najveću odgovornost nosit mi vijećnici koji će donosit odluke i proračune i sve ostalo. Nadam se da neće, a ja ga neću zvati, da neće bit sad red ispred vijećnika kod našeg novog načelnika i traženje-vučenje rukava.

Ja mu želim svu sreću. Naravno da ću podržat izbor gospodina Zijada Lugavića i ja mu želim sve najbolje u budućem radu. Također sve najbolje želim i našem državnom zastupniku dosadašnjem gradonačelniku Jasminu Imamoviću. Hvala.

NATAŠA PERIĆ

Hvala. Zaključujem raspravu vijećnika. Poslovnička.

MENSUR ALIĆ – vijećnik Tuzlanske alternative

Pozdravljam sve prisutne i predlažem da bude glasanje javno. Molim da se o tome izjasne vijećnici.

NATAŠA PERIĆ

Znači, molim da se izjasnite dal...s obzirom da je članom 146. Poslovnika predviđeno da se odluka izvrši, odnosno glasanje vrši javno ili tajno, evo prijedlog gospodina Mensura Alića da se javno glasa. Glasanje je okončano.

Konstatujem da je prijedlog Komisije za izbor i imenovanja da se za vršioca dužnosti gradonačelnika Grada Tuzle izabere...Pardon.

Konstatujem da je sa, 27 glasova za, niko nije bio protiv i nije bilo suzdržanih USVOJEN PRIJEDLOG DA SE O PRIJEDLOGU KOMISIJE ZA IZBOR I IMENOVANJA VIJEĆNICI IZJAŠNJAVANJU JAVNIM GLASANJEM.

A sada stavljam na izjašnjavanje PRIJEDLOG KOMISIJE ZA IZBOR I IMENOVANJA DA SE ZA VRŠIOCA DUŽNOSTI GRADONAČELNIKA GRADA TUZLE IZABERE ZIJAD LUGAVIĆ, DIPLOMIRANI EKONOMISTA. Molim vijećnike da se izjasne. (Aplauz.)

Samo malo da ja konstatujem.

Konstatujem da je sa, 27 glasova za, niko nije bio protiv i nije bilo suzdržanih USVOJEN PRIJEDLOG KOMISIJE ZA IZBOR I IMENOVANJA, TE DA JE GRADSKO VIJEĆE IZABRALO ZIJADA LUGAVIĆA, DIPLOMIRANOG EKONOMISTU, ZA VRŠIOCA DUŽNOSTI GRADONAČELNIKA GRADA TUZLE.

Dozvolite mi sada, da se u ime vijećnika Gradskog vijeća Tuzla, zamjenika predsjedavajućih, sekretara i u svoje ime, zahvalim gospodinu Jasminu Imamoviću na saradnji te da mu poželim puno lične sreće i uspjeha u daljem radu.

Želim sada, u ime vijećnika Gradskog vijeća Tuzla, zamjenika predsjedavajućih, sekretara i u svoje ime, novoizabranom vršiocu dužnosti gradonačelnika Grada Tuzle, gospodinu Zijadu Lugaviću, čestitati na izboru i poželjeti mu mnogo uspjeha u radu.

Pozivam novoizabranog vršioca dužnosti gradonačelnika Grada Tuzle, gospodina Zijada Lugavića, da nam se obrati. Izvolite. (Aplauz.)

ZIJAD LUGAVIĆ - novoizabrani vršilac dužnosti gradonačelnika Grada Tuzle

Hvala vam ljepo. Veoma velika čast i veoma velika trema. Često sam stajao za ovom govornicom ali pravo da vam kažem nisam imao ovakvu tremu kao što je danas imam.

Poštovana predsjedavajuća, dopredsjedavajuće i dopredsjedavajući Gradskog vijeća, dame i gospodo, Gradske vijećnice i Gradski vijećnici zahvaljujem na povjerenju koje ste mi upravo iskazali. Učinili ste mi veliko zadovoljstvo i izabrali me na funkciju vršioca dužnosti gradonačelnika Tuzle. Vaše povjerenje me uveliko i obavezuje. Moj posao će biti da do okončanja prijevremenih izbora za gradonačelnika Grada Tuzle zastupam sve građanke i građane Tuzle i rukovodim Službama za upravu i upravnom organizacijom.

Obećavam da ću u interesu svih građanki građana Tuzle vršiti funkciju vršioca dužnosti gradonačelnika Tuzle zajedno sa timom mojih saradnica i saradnika na jedan temeljit način i zajedno sa vama predstavnicima Gradskog vijeća raditi zakonito, raditi pošteno, raditi savjesno i raditi efikasno.

Bit ću vam cijelo ovo vrijeme na raspolaganju. Bit ću na raspolaganju i svim građankama i građanima Grada Tuzle.

Ovdje bih želio još da naglasim i jednu činjenicu da Grad Tuzla jeste doživio razvoj i u posljednjih deset-petnaest godina i u posljednjih 22 godine, a što se može vidjeti iz relevantnih izvještaja, relevantnih zavoda kao što je to Zavod za programiranje razvoja koji od 2016. godine prati elemente ekonomskog razvoja, odnosno socio-ekonomske pokazatelje svih općina u Federaciji Bosni i Hercegovini. I tu možemo da pogledamo koji je to trend razvoja. Da li on može da bude bolji? Sve što radimo u životu uvijek možemo bolje i nastojat ćemo da svi zajedno napravimo bolje sutra za sve nas i za sve naše građanke i građane Grada Tuzle.

Iako je vrijeme obavljanja funkcije vršio dužnosti gradonačelnika Grada Tuzle, na koju ste me evo izabrali ograničeno i traje samo do okončanja postupka direktnog izbora

gradonačelnika Tuzle, jasna mi je odgovornost i obaveza koju prihvatam. Neće nam sigurno biti lako.

Takođe želim da kažem da je pred nama jedan prvi zajednički veliki korak koji moramo do kraja godine zajedno da napravimo, a to je usvajanje najznačajnijeg dokumenta koji se usvaja na nivou lokalne samouprave u toku jedne godine, a to je Budžet Grada Tuzle koji će za naredni period pokazati pravce i prioritete u razvoju našega grada.

Pored toga moram da kažem da apsolutno nije jednostavno obnašati funkciju vršioca dužnosti, pa i na ovako kratko vrijeme nakon gradonačelnika Jasmina Imamovića koji je u protekle 22 godine svoj posao obavljao savjesno, obavljao pošteno i bio je predan dužnostima gradonačelnika Grada Tuzle, koji je preporučio naš grad i koji je čitav svoj radni vijek posvetio razvoju Tuzle.

Siguran sam da ćemo moj tim i ja uspjeti da sačuvamo do sada izgrađeno. Radit ćemo na implementaciji ciljeva dakle i pravaca definisanih strategijom razvoja našeg grada do 2026. godine. Zajedno ćemo inovirati ovu strategiju da ona bude još bolja i još kvalitetnija. Radit ćemo i na implementaciji i realizaciji novih projekata i novih vrijednosti.

Ovdje moram da kažem da ćemo, siguran sam, moj tim i ja raditi prvenstveno i onu najznačajniju funkciju po kojoj je naš grad prepoznat ne samo u Bosni i Hercegovini nego i u Evropi i u svijetu, a to je da ćemo zajedno raditi na održavanju dakle, zajedničkog života i tekovina antifašizma.

Naravno da ćemo raditi i na stvaranju još boljeg i kvalitetnijeg ambijenta za razvoj i socijalne pomoći, razvoj i ovlasti i kulture i sporta i umjetnosti, razvoj u smislu povećanja ambijenta za poslovanje privrednih subjekata kako bismo stvorili još bolji ambijent da povećamo broj privrednih subjekata, da smanjimo nezaposlenost, da radimo sa socijalnim kategorijama na projektima zapošljavanja. Dakle, da stvaramo uslove za bolji ekonomski, društveni i sve druge vrste razvoja našeg grada. To možemo da radimo samo na zajednički način. Takođe želim da istaknem da sve ovo i još mnogo toga...ne bih želio da idem dosta široko jer ovo je izbor na funkciju vršioca dužnosti gradonačelnika.

Ja moram da kažem da sve što budemo radili, radit ćemo u skladu sa zakonom. Radit ćemo u skladu sa raspoloživim finansijskim sredstvima.

Vi me svi znate ovdje evo već dugi niz godina. Neko kraće, neko duže. Ja sam uvijek bio otvoren i bit ću otvoren za saradnju. Uvijek sam razgovarao, uvijek sam primao građane, privrednike, sve one koji su tražili da razgovaraju samnom. Tako će biti, tako će biti i u budućnosti.

Zahvaljujem što preuzimam ovako stručan i savjestan tim mojih suradnica i suradnika čija će mi pomoć veoma puno značiti da realizujemo sve one projekte i sve one aktivnosti koje su pred nama.

U to ime bih želio još da kažem poštovana predsjedavajuća, dopredsjedavajuće i dopredsjedavajući Gradskog vijeća, uvažene Gradske vijećnice i Gradski vijećnici, drage kolegice i kolege, poštovani gosti, hvala vam još jednom što ste me danas podržali i izabrali na funkciju vršioca dužnosti gradonačelnika Tuzle i još jednom napominjem da ću svima vama, svim građankama i građanima Grada Tuzle, svim privrednim subjektima, nevladinim organizacijama, svima koji rade, edukuju se, realizuju poslovne aktivnosti ili bilo koje druge aktivnosti na području grada Tuzle biti uvijek na raspolaganju. Hvala vam puno. (Aplauz.)

NATAŠA PERIĆ

Hvala gospodinu Lugaviću.

Pod tačkom dva su:

TEKUĆA PITANJA

Nemamo nikakvih prijedloga tako da zaključujem 6. vanrednu sjednicu i zamolit ću vijećnike samo malo da se ovdje fotografišemo sa novoizabranim vršiocem dužnosti. Evo samo da se fotografišemo.

(S obzirom da je Dnevni red iscrpljen i 6. vanredna sjednica Gradskog vijeća Tuzla zaključena ista je završena u 10:50 sati.)

STENOGRAM SAČINILI:

Selma Šehić

Jasminka Delalić

P R E D S J E D A V A J U Ć I

Nataša Perić, prof. s.r.